

黎氏家集

二

黎氏家集

鈴石齋

詩鈔

序

記曰溫柔敦厚詩教也顧業斯術者苟非讀書窮理陶淑性情則發為歌詠其能不悖聖教歟昔黼備員史館竊聞聶蓉峯前輩指屈中外能詩者流甚稱黎君雪樓經術詩文不置口未幾君侍其尊人靜圃先生宦東魯來遊

闕下遂成進士始與君識面訂交焉每值攜酒登臨商榷今古意興所到落筆千言灑灑洋洋不可一世私心竊慕為不可及久之君奉

命宦浙東余亦出守播郡中間宦海浮沈蹤迹相左追

念往昔輒以未得罄其所蘊為慊戊戌冬黎君來宰敝
邑覲面未久復運京銅北上展

覲歸來始得與君樂數晨夕君以縣舊無志囑余創稿
時過從商論旁及詩詞因以拙稿懇其刪訂君亦出古
今詩文相示披誦之餘見其波瀾壯濶雅健清深自非
明理達道博通風雅者奚能望其肩背哉然君猶謙抑
自下恆謂其詩不足傳又以外吏未獲登

閬苑侍

廟堂載筆從容與朝士大夫歌詠承平潤色鴻業為己
恨則知其蘊蓄於中而未盡洩露者正多也蓋君自少

至老好學不倦尤博通漢宋諸儒之學而涵養深邃有
儒者風故發為詩歌一本于性情之正而纏綿惻怛初
無噍殺之音是卽所謂溫柔敦厚者在是也得謂其詩
不足傳耶君泣任數年勤民故事不擾不煩教人以敦
倫飭紀為先課士以窮經致用為實醇儒循吏合而為
一詩特緒餘焉耳黼雖不文然與君交厯數十年知君
頗深今又樂得讀君詩遂為書其梗概如此道光乙巳
秋大姚劉榮黼

蚺石齋詩鈔卷第一

導義 黎恂 雪樓

齋中詠懷

古人不可作迺以其書傳文章壽萬世日月懸中天後
儒闡厥蘊紛綸注與箋浩如煙海中猥欲勤鑽研飲河
類齷鼠雖飽亦涓涓便腹五經笥吾慙邊孝先

讀書固貴多尤當領其要精華旣采擷糟粕直須埽曼
衍彌支離心力枉消耗搖搖無終薄翻似風中蠹窮經
實荒經甘為識者誚因念百家言置之可勿道

宣子稱好學茅茨常不完元亮善屬文簞瓢有餘歡士

虫石齋詩金卷一
苟自振勵何妨處饑寒蕭然環堵中俯仰天地寬攻苦
得至樂所獲良已殫區區計科名志乃不足觀

夏日晚飲席上作

漠漠輕陰近粉牆小軒幽寂晝凝香谿風乍到埽殘雪
山雨忽來生晚涼蘭席流芬佳果薦綺窗浥潤素琴張
酒尊茗椀情何限醉倚闌干話夕陽

旅夜

夜闌翻不寐斜月照街西乍吠別邨犬時聞茅店雞枕
邊寒漏寂窗外曉光迷便欲驅車去前程趁馬蹏

省谿

野渡人歸去殘陽照別邨
洲前芳草合水際亂雅翻
黍登場晚牛羊下嶺昏
徼征何處客惆悵黯銷魂

舟中雜詠

灘險石成堆灘聲吼若雷
巨桴排陣下高浪破空來
纜重牽還伏船遲往復迴
洶洶真駭絕直使寸心摧

夜泊

夜靜涼初覺船頭獨卧看
星光沈水碧雲影照波寒
客喜漁歌肅秋隨鳥夢閒
鷓鴣腥氣過幽火下前灘

阻風傅家磯

繫纜臨江渚長空雁影過
夕陽明遠水秋草動涼波
客

舫停如蟻君山望似螺雲帆高挂好無柰北風多

夜過洞庭

菰蒲夜靜聞刁調船舳嚶戛風蕭蕭起看明月滿湖白
天垂大野澄秋宵長年鼓柁聚羣力張帆直下乘怒濤
湖光月色兩相映茫然萬頃圍周遭太虛元氣或動盪
風波決潏魚龍高水天上下渺無極君山一點凝纖毫
是時星斗正澄澈雲君長嘯山鬼號湘妃歌舞出遊戲
金支翠旗光動搖帶雲霞兮紉蘭佩珊珊輕舉羅裳飄
淩波為鼓水仙操羣靈合沓紛逍遙我駕萬斛舟手持
碧玉簫乘風破浪杳然去蒼然勢欲凌丹霄將過鶴樓

招仙子擬騎黿背尋金焦九疑縹緲不得近蒼梧雲氣
浮清寥夜闌月落星斗溼洪濤春拍迴商飈船人擊鼓
東湖泊曉光波影連魁杓湖頭大叫吹笛叟仰天痛飲
歌離騷

樊城河中

小艇衝煙去遠津輕風生浪細鱗鱗萬山潭水清如許
不見當年解佩人

涿州題壁

旅店一杯酒衝開萬丈愁黃塵遮涿鹿白日澹幽州冒
冷驕驕馬蒙寒貂鼠裘皇都離咫尺含笑過盧溝

往通州

葦斷荷枯處寒風似裂繒遙林齊落葉野水漸生冰短
袖衣裳薄長途酒價增官齋容下榻吟賞試挑鐙時偕趙蘆

洲

太守應汪東序
府丞招閱府試卷

花朝節河間道中

千里平沙客路紆曉晴天氣澹煙鋪橋頭流水冰初解
陌上春風草欲蘇積潤雨從前夜下衝寒酒向別邨沽
行程屈指花朝節可惜看花卻又無

秦淮水榭次王漁洋先生韻

涼風高柳水東頭十里清淮映月流南渡笙歌空舊院

白門煙樹鎖危樓。天垂淨宇，澄澄夜潮落，寒沙瑟瑟秋。
何處疏燈猶賣酒，後庭花唱起人愁。

丹徒鎮船行擁擠有作

大船嘈嘈排艨艟。小船戢戢相撞，搥船多水淺，紛擁擠。
前路窄狹，不可通。榜人撐篙進復卻，終日掀簸泥淖中。
不及岸前手車子，一推一輓走如風。

遊金山寺次東坡先原韻

南瞰潤州北維揚。西望秣陵東滄海，江心樓觀峙崢嶸。
玉帶山門至今在，開山憶自裴頭陀。黃金氣涌浮江波，
從此山靈擅名勝。琳宮梵宇巍然多，我來登覽偶停櫂。

第一泉邊已斜日拾級初攀石磴危朱闌色映殘霞赤
上凌絕頂動心魄浮圖倒影半江黑亭前四顧皆空明
一聲長嘯魚龍驚老僧見面如舊識為我指示殿中物
我謂山僧常住山講經應化頑石頑中流砥柱不可已
莫使此山飛去蓬萊水

山麓石碣刊中
流砥柱四大字

雨後涼甚

翛然一雨灑銀河洗淨塵居竹樹窩小李谿山如畫好
高梧庭院得秋多潤餘屋角疏疏網涼透江心瑟瑟波
石隱難成成吏隱澹然踪跡憶巖阿

觀濤行

餘杭勝概非西湖錢塘潮水天下無江流三折來盤紆
海水逆上搖蓬壺鼈子疊旁沙石麤夾以龕赭兩峰孤
迫束水勢不得踰靈潮到此翻奔趨誰謂神者楚國胥
朱旗白馬虬髯須手提文種劍屬鏤臂挽強弓金僕鉞
拍浮波面方浩呼隨從水犀甲萬夫掀波助浪鼓隴胡
怒濤洶涌驚鷗鳬亘如山嶽排岨嶬奮如雷霆鞭濁鯨
堅如重壘森車徒勇如三軍摧朽枯前引蛟龍紛吐珠
後擁太白仍援抱銀濤滾滾雪練鋪聲喧萬鼓沈千桴
澎騰奮激走且驅長魚巨鰐皆逃遁混混底底連尾閭
汨汨潏潏來灌輸逆流千里爭須臾歸神曰毋聊踟躕

卓然奇觀狀名區一洗從前拘與迂
開拓胸腑振襟裾霍然病已良
非誣仰天長嘯歌吳歆怪異詭觀誠難摹
含毫授簡煙墨濡待延枚叟其可乎

久旱禱雨作

五日不雨澤少濡十日不雨苗將枯
况乃兼旬雨俱無田水焉有不涸乎
桐谿百里貌一隅東南沃壤泥惟塗
春郊漲滿唬鷓鴣梅雨蒸靈浸陂湖
夏秋以來水不敷驕陽日日熏洪鑪
高田低壠艱灌輸桔槔翩聯響菰蒲
連塍龜坼成青蕪雲霓之望愁農夫
南村北村集師巫鏜其擊鼓笙以竽
野祠荒社紛告呼若崩厥角流汗趨

咨余作宰慙牧芻恪遵典禮虔修雩伏龍嬾起如逃逋
投淵竟欲煩於菟浹旬請命帝不俞昭回長仰雲漢圖
吏實不臧民何辜蘊隆蟲蟲徒嗟吁焉得疾雷飛電驅
傾倒江海人其蘇秋禾告登稻荼鋪田家香飯炊雕胡
打門豈勞吏催租簫管報賽神歡娛訟簡刑清百無虞
祝 聖人壽歌康衢

丁丑中秋與子元

愷

弟翫月桐鄉官舍時兩

大

人已諷吉還里令子元侍行團聚未久又動離情
對景言懷感念今昔成詩一首送其南行并誌別
况